



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o podizanju Spomen-obilježja civilnim žrtvama rata grada – Kantona Sarajevo
'92. – '95. godine
(Prijedlog)

Predlagač: Gradonačelnica

Obradivač: Služba za urbano planiranje,
investicije, stambene i komunalne poslove

Sarajevo, juli 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) i člana 20. Odluke o spomenicima od značaja za Grad Sarajevo („Službene novine Kantona Sarajevo“, br. 49/19, 28/20 – Ispravka), Gradsko vijeće Grada Sarajeva, na __. sjednici održanoj dana __. __. 2024. godine, donijelo je

(Nacrt)

**Odluku
o podizanju Spomen-obilježja civilnim žrtvama rata grada – Kantona Sarajevo
'92. – '95. godine**

**Član 1.
(Predmet)**

Podiže se Spomen-obilježje civilnim žrtvama rata grada – Kantona Sarajevo '92.-'95. (u daljnjem tekstu: Spomen-obilježje), kao Spomen-obilježje od značaja za Grad Sarajevo.

**Član 2.
(Lokacija i idejno rješenje)**

Spomen-obilježje se podiže na zemljištu označenom kao dio k.č. 801/3, k.o. Sarajevo VII, općina Centar Sarajevo, a prema idejnom rješenju koji je sastavni dio ove Odluke.

**Član 3.
(Obaveze)**

Grad Sarajevo će poduzeti sve aktivnosti na podizanju Spomen-obilježja i budućeg održavanja.

**Član 4.
(Finasiranje)**

Finasiranje izgradnje i održavanja Spomen-obilježja snosi Grad Sarajevo.

**Član 5.
(Stupanje na snagu)**

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:
Sarajevo, __. __. 2024. godine

OBRAZLOŽENJE

PRAVNI OSNOV

Pravni osnov za donošenje ove odluke sadržan je u odredbama člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) kojim je propisano da Gradsko vijeće donosi odluke, druge propise i opće akte i daje njihovo tumačenje.

Pravni osnov sadržan je i u članu 20. Odluke o spomenicima od značaja za Grad Sarajevo („Službene novine Kantona Sarajevo“, br. 49/19, 28/20 – Ispravka) kojim je propisano da Odluku o podizanju spomenika od značaja za Grad Sarajevo donosi Gradsko vijeće Grada Sarajeva.

RAZLOZI DONOŠENJA

Spomenik civilnim žrtvama grada – Kantona Sarajevo '92.-'95. godina je inicijativa Unije civilnih žrtava rata Kantona Sarajevo koje je krovno udruženje civilnih žrtava rata, a koje u svom članstvu ima 3925 registriranih članova, odnosno 2094 aktivnih članova. Također, važno je istaći da je Unija pravni sljednik Saveza civilnih žrtava rata grada Sarajeva koji egzistira od 1974. godine.

Opsada grada Sarajeva bila je najduža u modernoj historiji, a trajala je 1479 dana, ranjeno je preko 50.000 naših sugrađana, 11.541 stanovnik grada Sarajeva je ubijen, od toga je 1601 dijete, a dnevno je grad razaralo 329 granata. Zločin počinjen prema gradu Sarajevu i njegovim stanovnicima je bez presedana u historiji i toliko je velik da je svaki pokušaj njegovog negiranja i minimiziranja sramotan.

Kolateralna šteta agresije su civilne žrtve rata, osobe sa invaliditetom i porodice ubijenih civila koji su ni krivi ni dužni stradali u agresiji na nezavisnu državu Bosnu i Hercegovinu izgubivši živote, dijelove tijela ili svoje najmilije.

Nakon 25 godina civilne žrtve rata grada – Kantona Sarajevo nisu dobile moralnu satisfakciju (nije izgrađeno jedinstveno spomen-obilježje) i iz tog razloga gradonačelnica nastavlja aktivnosti na podizanju ovog spomen-obilježja.

Izgradnja spomenika treba da bude simbol sjećanja na sve ubijene i ranjene civile grada – Kantona Sarajevo u periodu agresije i opsade 92.-95.

Javnim konkursom je izabrano najbolje idejno rješenje za Spomen-obilježje civilnim žrtvama rata grada – Kantona Sarajevo '92.-'95. godine (arhitektonsko-urbanističko-pejsažno rješenje).

Idejno rješenje u ambijentalnom, prostornom i vizuelnom smislu očituje trajnu uspomenu na tragediju i patnju civilnog stanovništva tokom opsade Sarajeva, te objedinjuje simbole sjećanja, mira, jedinstva, otpora i opstanka.

Planirana namjena ovog prostora je javnog karaktera, sa otvorenim i dostupnim površinama koje uključuju adekvatno pozicionirane pješačke staze. Prostor će biti prilagođen osobama sa invaliditetom i umanjenim tjelesnim sposobnostima.

Poštuje se kontekst lokacije, značaj i reprezentativnost objekata u neposrednom okruženju, te činjenica da je ovo veoma vrijedan gradski prostor. Vodilo se računa o pozicioniranju spomen-obilježja u odnosu na teren, linije komunikacije i uglove sagledavanja.

Također, u cilju aktivnog korištenja i akcentiranja prostora, predmetni obuhvat je planiran adekvatno osvijetliti, a planirane su ekološki i ekonomski prihvatljivi materijali.

Arhitektonsko rješenje je originalno, estetski primjereno temi spomenika, ekonomično u izvođenju i održavanju te će se u cijelosti izvoditi na samom lokalitetu. Također, planirano je da se na spomeniku nalazi prigodan tekst opisa spomenika.

Izgradnja Spomen-obilježja treba da bude simbol sjećanja na sve ubijene i ranjene civile grada i Kantona Sarajevo u periodu agresije i opsade 1992.-1995.

Odluka stupa na snagu narednog dana od dana objavljivanja u „Službenim novinama Kantona Sarajevo“.

FINANSIJSKA SREDSTVA

Za realizaciju ove odluke potrebno je planirati sredstva u Budžetu Grada Sarajeva za DOB 2025.-2027. godinu.